

საქართველოს კანონი

**ამნისტიის შესახებ**

ჰუმანიზმის პრინციპიდან გამომდინარე, ერთჯერადი, დროებითი და განსაკუთრებული ღონისძიების სახით, საზოგადოებრივი საშიშროების ხარისხის გათვალისწინებით, ამ კანონის საფუძველზე, საქართველოს სისხლის სამართლის კოდექსით (საქართველოს საკანონმდებლო მაცნე, №41(48), 1999 წელი, მუხ. 209) გათვალისწინებული დანაშაულის ჩადენისათვის მსჯავრდებულ პირებს, რომლებსაც მისჯილი აქვთ უვადო თავისუფლების აღკვეთა, სასჯელის სახედ განესაზღვრებათ ვადიანი თავისუფლების აღკვეთა, ასევე დანიშნული სასჯელი უმცირდებათ ამნისტიის მიღების მომენტამდე ჩადენილი დანაშაულისთვის ბრალდებულ/მსჯავრდებულ პირებს და თავისუფლდებიან სისხლის სამართლის კოდექსით გათვალისწინებული აღუსრულებელი ჯარიმისგან და საურავისგან.

**მუხლი 1**

1. მსჯავრდებულ პირს, რომელსაც ამ კანონის ამოქმედების მომენტისათვის სასჯელის სახით დანიშნული აქვს უვადო თავისუფლების აღკვეთა, სასჯელის სახედ და ზომად განესაზღვროს თავისუფლების აღკვეთა 30 წლის ვადით.

**მუხლი 2**

1. გათავისუფლდეს სისხლისსამართლებრივი პასუხისმგებლობისა და სასჯელისაგან პირი, რომელმაც ჩაიდინა საქართველოს სისხლის სამართლის კოდექსის 265-ე და 273<sup>1</sup>-ე მუხლით გათვალისწინებული დანაშაული.

**მუხლი 3**

1. გაუნახევრდეს დანიშნული სასჯელი და პირობით მსჯავრდებულ პირს გამოსაცდელი ვადა, რომელმაც ჩაიდინა საქართველოს სისხლის სამართლის კოდექსით გათვალისწინებული ნაკლებად მძიმე დანაშაული.
2. გაუნახევრდეს დანიშნული სასჯელი ქალს და პირობით მსჯავრდებულს გამოსაცდელი ვადა, რომელმაც ჩაიდინა, საქართველოს სისხლის სამართლის კოდექსით გათვალისწინებული ნაკლებად მძიმე, მძიმე ან/და განსაკუთრებით მძიმე დანაშაული.

3. გაუნახევრდეს დანიშნული სასჯელი და პირობით მსჯავრდებულ პირს გამოსაცდელი ვადა, რომელმაც ჩაიდინა საქართველოს სისხლის სამართლის კოდექსის 332-ე-342<sup>2</sup>-ე მუხლით გათვალისწინებული დანაშაული.
4. გაუნახევრდეს დანიშნული სასჯელი და პირობით მსჯავრდებულ პირს გამოსაცდელი ვადა, რომელმაც ჩაიდინა სისხლის სამართლის კოდექსის 260-ე მუხლის პირველი, მე-2, მე-3, მე-6 ნაწილით გათვალისწინებული დანაშაული და 261-ე მუხლის პირველი, მე-2, მე-3, მე-7 ნაწილით გათვალისწინებული დანაშაული.
5. გაუნახევრდეს დანიშნული სასჯელი და პირობით მსჯავრდებულ პირს გამოსაცდელი ვადა, რომელმაც ჩაიდინა სისხლის სამართლის კოდექსის 262-ე, 263-ე და 264-ე მუხლით გათვალისწინებული დანაშაულები;
6. გაუნახევრდეს დანიშნული სასჯელი და პირობით მსჯავრდებულ პირს გამოსაცდელი ვადა, რომელმაც ჩაიდინა სისხლის სამართლის კოდექსის 266-ე და 267-ე მუხლით გათვალისწინებული დანაშაული.
7. გაუნახევრდეს დანიშნული სასჯელი და პირობით მსჯავრდებულ პირს გამოსაცდელი ვადა, რომელმაც ჩაიდინა სისხლის სამართლის კოდექსის 269-ე-273-ე და 274-ე მუხლით გათვალისწინებული დანაშაული;

#### მუხლი 4.

1. ერთი მეოთხედით შეუმცირდეს სასჯელი და პირობით მსჯავრდებულ პირს გამოსაცდელი ვადა, რომელმაც ჩაიდინა საქართველოს სისხლის სამართლის კოდექსით გათვალისწინებული მძიმე ან/და განსაკუთრებით მძიმე დანაშაული გარდა დანაშაულისა, რომელიც მიმართული იყო არასრულწლოვნის წინააღმდეგ.
2. ამ მუხლის პირველი პუნქტით განსაზღვრული გამონაკლისი, არ მოქმედებს არასრულწლოვნის მიერ არასრულწლოვნის წინააღმდეგ ჩაადენილ დანაშაულზე.
3. გაუნახევრდეს სასჯელი და პირობით მსჯავრდებულ პირს გამოსაცდელი ვადა, რომელმაც ჩაიდინა საქართველოს სისხლის სამართლის კოდექსით გათვალისწინებული მძიმე ან/და განსაკუთრებით მძიმე დანაშაული, თუ დაზარალებული ან/და დაზარალებულის უფლებამონაცვლე ამ კანონის გამოყენებისას გამოძიების ან სასამართლოს წინაშე თანხმობას განაცხადებს, რომ ამ პიროზე გავრცელდეს ამ კანონით გათვალისწინებული ამნისტია. თუ დაზარალებულის უფლებამონაცვლე გარდაცვლილია ან ვერ იძებნება, ამ კანონით გათვალისწინებული ამნისტია გავრცელდება ამ მუხლში აღნიშნულ პიროზე, თუ ამაზე თანხმობას ამ პუნქტით დადგენილი წესით განაცხადებს დაზარალებულის

ოჯახის ყველა სრულწლოვანი, ქმედუნარიანი წევრი (დედა, მამა, მეუღლე, შვილი).

#### **მუხლი 5.**

1. ამ კანონით გათვალისწინებული სისხლისსამართლებრივი პასუხისმგებლობისა და სასჯელისაგან გათავისუფლება ან/და სასჯელის შემცირება ერთნაირად და პროპორციულად ვრცელდება თავისუფლების აღკვეთის სახით დანიშნულ რეალურ სასჯელზე, პირობით მსჯავრსა და გამოსაცდელ ვადაზე, როგორც ძირითად, ისე დამატებით სასჯელზე, მათ შორის ჯარიმისა და ქონების ჩამორთმევაზე.

#### **მუხლი 6.**

1. პირს, რომელზედაც ვრცელდება ამ კანონის მე-2 და მე-3, მე-4 და მე-5 მუხლის მოქმედება, სასჯელისაგან გათავისუფლებასთან/შემცირებასთან ერთად აღუდგეს „ნარკოტიკული დანაშაულის წინააღმდეგ ბრძოლის შესახებ“ და საქართველოს კანონის საფუძველზე ჩამორთმეული უფლებები.

#### **მუხლი 7.**

1. პირი, რომელზედაც ვრცელდება ამ კანონის მოქმედება განთავისუფლდეს აღუსრულებელი ჯარიმისგან და შესაბამისი საურავისგან.

#### **მუხლი 8**

1. ბრალდებულზე ამ კანონის პირველი-მე-7 მუხლებით გათვალისწინებული ამნისტიის გავრცელების თაობაზე გადაწყვეტილებას გამოძიების სტადიაზე იღებს შესაბამისი პროკურორი.
2. ბრალდებულზე/მსჯავრდებულზე ამ კანონის პირველი-მე-7 მუხლებით გათვალისწინებული ამნისტიის გავრცელების თაობაზე გადაწყვეტილებას საქმის სასამართლო განხილვის სტადიაზე იღებს შესაბამისი სასამართლო.
3. მსჯავრდებულზე ამ კანონის პირველი-მე-7 მუხლებით გათვალისწინებული ამნისტიის გავრცელების თაობაზე გადაწყვეტილებას დასრულებული სამართალწარმოების საქმეზე იღებს თავდაპირველი გადაწყვეტილების გამომტანი რაიონული (საქალაქო) სასამართლო, რომელსაც პატიმრობაში ან პრობაციის

რეჟიმში მყოფი მსჯავრდებულის პირად საქმეს ამავე კანონის ამოქმედებიდან 2 კვირის ვადაში მიაწვდის შესაბამისი სასჯელაღსრულების დაწესებულება, პრობაციის ბიურო ან სამხედრო ნაწილის ხელმძღვანელობა, ხოლო ძეგნილ მსჯავრდებულზე ამ კანონით გათვალისწინებული ამნისტიის გავრცელების შესახებ იმავე ვადაში მიმართავს საქართველოს პროკურატურა. სასამართლო უფლებამოსილია ამნისტიის გავრცელების საკითხი განიხილოს ზეპირი მოსმენის გარეშე.

4. ამ კანონის პირველი-მე-7 მუხლებით გათვალისწინებული ამნისტია აღსრულდეს ამავე კანონის ამოქმედებიდან 2 თვის ვადაში.

### **მუხლი 9**

1. ყველა პირს, რომლებზედაც გავრცელდება ამ კანონის მოქმედება, უფლება აქვს, ისარგებლოს თავისი სისხლის სამართლის საქმის სამართლიანი სასამართლოს მიერ განხილვის უფლებით.

### **მუხლი 10**

1. ამ კანონის გამოყენების შესახებ გადაწყვეტილება პირს, რომელზედაც გავრცელდა ამნისტია, შეუძლია გაასაჩივროს ერთჯერადად, მისთვის გადაწყვეტილების ჩაბარებიდან 2 კვირის ვადაში, საქართველოს უზენაესი სასამართლოს სისხლის სამართლის საქმეთა საკასაციო პალატაში. სასამართლო საჩივარს განიხილავს დასაშვებობის საკითხის გადაწყვეტის გარეშე, მისი წარდგენიდან 10 დღის ვადაში, ზეპირი მოსმენით, მხარეთა მონაწილეობით.

### **მუხლი 6**

ეს კანონი ამოქმედდეს გამოქვეყნებისთანავე.